

氏族典第三百八十五卷

李姓部列傳五

唐一 李延伯 李真

按唐書南陽公延伯傳太祖子南陽公延伯蚤薨無嗣高祖武德中追封

按唐書譙王真傳太

祖子譙王真從太祖戰歿無嗣

李璋

按唐書畢王璋傳太祖子畢王璋仕周爲梁州刺史與趙王祐謀殺隋文帝不克死生二子曰韶曰

孝基韶死隋世武德時追封東平王生子道宗

李禕 李蔚 李亮 李澄 李湛

按唐書郇王禕傳太祖子郇王禕爲隋上儀同三司生子叔良德良幼良

按唐書蔡烈王蔚傳

太祖子蔡烈王蔚爲周朔州總管生子安哲

按唐書鄭孝王亮傳太祖子鄭孝王亮仕隋爲海

州刺史追王生子神通神符

按唐書梁王澄傳世祖子梁王澄蚤薨無嗣武德初追封

按

唐書蜀王湛傳世祖子蜀王湛生子博父奉慈

李孝基

按唐書永安壯王孝基傳孝基武德初得王歷陝州總管鴻臚卿以罪奪官二年劉武周寇太原夏人呂崇茂以縣應賊詔孝基爲行軍總管攻之師敗孝基執于賊謀亡歸爲賊所害贈諡無子以兄子道立嗣封高平王後降封縣公終陳州刺史曾孫涵

李叔良

按唐書長平王叔良傳叔良武德初例王鎮涇州突厥入寇詔叔良擊之中流矢道薨子孝協嗣

李德良

按唐書新興郡王德良傳德良少以疾不任職薨贈涼州都督孫晉先天中爲雍州長史治有名襲王坐豫太平公主謀被誅改氏厲

李幼良

按唐書長樂郡王幼良傳幼良資暴急高祖數曉勸不悛有盜其馬者輒殺之帝怒杖之百乃釋去

爲涼州都督嘯不逞爲左右市里苦之太宗立或告王陰養士交境外遂賜死

李安 李哲

按唐書西平懷王安傳安仕隋爲右領軍大將軍封趙公武德時例王生子琛孝恭瑊瑒

按唐

書濟南郡王哲傳哲爲隋柱國備身將軍追王子瑗

李神通

按唐書淮安靖王神通傳神通少輕俠隋大業末在長安會高祖兵興吏逮捕亡命入鄂南山與豪英萬寶等舉兵應從平京師爲宗正卿典兵宿衛王永康郡俄徙淮安武德初拜山東安撫大使遷左武衛大將軍薨贈司空神通十一子得王者七人道彥孝管孝同孝慈孝友孝節孝義皆降王孝逸爵公孝銳不得封有子齊物顯

李神符

按唐書襄邑恭王神符傳神符字神符少孤事兄謹高祖興兵神符留長安爲衛文昇所囚京師平封安吉郡公帝受禪例王遷并州總管召爲太府卿遷揚州大都督累擢宗正卿改光祿大夫遷開

府儀同三司永徽二年薨子七人並爵郡王例降公惟德懋文陳知名德懋官少府監臨川郡公文陳幽州都督魏國公垂拱中坐累貶滕州別駕誅子挺捷襲封挺曾孫程

李建成

按唐書隱太子建成傳建成小字毗沙門資簡弛不治常檢荒色嗜酒畋獵無度唐國建爲世子高祖受禪立爲皇太子而秦王數平劇寇功冠天下英豪歸之建成恐與齊王元吉通謀內結妃御以自固會突厥寇邊太子薦元吉北討欲因其兵作亂尉遲敬德等勸秦王先圖之王乃密奏建成等與後宮亂帝大驚報曰旦日當窮治遲明建成元吉至臨湖殿覺變遽反走秦王隨呼之元吉引弓欲射不能彀者三秦王射建成卽死元吉中矢走敬德追殺之長子成宗爲太原王早卒承道安陸王承德河東王承訓武安王承明汝南王承義鉅鹿王皆坐誅太宗立追封息王諡隱以子福爲嗣

李元霸

按唐書衛懷王元霸傳元霸字大德幼辯惠隋大業十年薨年十六無子武德元年追王及諡以太宗子泰爲宜都王奉其祀徙封越更以西平王瓊子保定嗣薨無子國除

李元吉

按唐書巢刺王元吉傳元吉小字三胡封姑臧郡公進齊國高祖受禪進王齊爲并州總管元吉猜
驚好兵居邊久益驕侈劉武周以五千騎屯黃蛇嶺元吉使將軍張達以步卒百人嘗寇達辭兵少
彊之至則盡沒達怒導武周攻之元吉委軍奔京師并州陷帝怒自是嘗令從秦王征討不復顯軍
矣尋授侍中累進司徒并州大都督時秦王有功而太子不爲中外所屬元吉喜亂欲并圖之乃構
於太子又承間請害秦天帝不應死年二十四子承業爲梁郡王承鸞漁陽王承獎晉安王承裕江
夏王承度義陽王並伏誅貞觀初改葬追爵海陵郡王及諡後改封巢以曹王明嗣

李智雲

按唐書楚哀王智雲傳智雲初名稚詮善射工書突隋大業末從建成寓河東高祖初建成走太原
吏捕智雲送長安爲陰世師所害武德元年追王及諡三年以太宗子寬爲嗣寬早薨國除貞觀三
年復以濟南公世都子靈龜嗣歷魏州刺史爲政威嚴盜賊不發薨子福嗣降爲公卒子承況嗣神
龍中爲右羽林將軍同節愍太子死于難

李元景

按唐書荆王元景傳元景武德三年王趙貞觀初累遷雍州牧十年徙封荆永徽初進位司徒房遺愛謀反坐子則與往還繫獄賜死久之追封沈黎王以渤海王奉慈子長沙嗣降爲侯神龍初復王爵以孫元逖嗣薨無子國除

李元昌

按唐書漢王元昌傳元昌初王魯累遷梁州都督後徙封漢有勇力善騎射數觸軌憲太宗手詔誨督乃怨望附太子承乾事敗賜死國除

李元亨 李元方

按唐書酈悼王元亨傳元亨貞觀二年授金州刺史之藩六年薨無子國除
按唐書周王元方傳元方武德四年封貞觀三年薨無子國除

李元禮

按唐書徐康王元禮傳元禮性恭畏善騎射始王鄭卽授鄭州刺史後徙王徐遷徐州都督爲絳州

刺史有治名璽書勞勉實封至千戶永徽中薨三子茂爲淮南王餘爵公茂險薄無行初元禮疾姬趙有美色茂逼烝之元禮切責茂恚屏侍衛藥膳以不食薨茂嗣上元中事洩流死振州神龍初以茂子瓘嗣開元中爲宗正員外郎薨子延年嗣拔汗那王入朝廷年將以女嫁之爲右相李林甫劾奏貶文安郡別駕終餘杭司馬國除永泰初以其子諷嗣王

李元嘉

按唐書韓王元嘉傳元嘉字元嘉始王宋後改王徐爲潞州刺史在潞時年十五聞太妃病涕泣不食居喪毀甚少好學藏書至萬卷與弟靈夔友愛閨門修整當世稱之貞觀九年更封韓武后得政進授太尉徙定州刺史以霍王元軌爲司徒舒王元名爲司空滕王元嬰開府儀同三司魯王靈夔太子太師越王貞太子太傅紀王慎太子太保外示尊寵而內將圖之垂拱中元嘉徙絳州刺史與子讓及越王子冲糾合宗室同舉兵未發會武后詔宗室朝明堂元嘉至京師謀泄后逼令自殺詔改氏元嘉魯王越王爲虺元嘉六子訓潁川王誼武陵王誡上黨公蚤卒讓黃公工爲辭章出爲通州刺史辭病歸且謀應越王也誡通音律歷杭州別駕與讓俱死神龍初追復元嘉爵土以第五子

訥嗣薨子叔璩嗣歷國子司業薨子煒嗣建中中改王鄆後懿宗以鄆王卽位復改嗣韓王云

李元則

按唐書彭思王元則傳元則字彝初王荆出爲婺州刺史貞觀十年徙王爲遂州都督以冠服奢僭免久之爲澧州刺史更折節厲行薨贈司徒荊州大都督無子以霍王子絢嗣龍朔中封南昌王薨子志疎嗣開元中爲宗正卿

李元懿

按唐書鄭惠王元懿傳元懿始王滕貞觀中出爲兗州刺史徙王歷鄭潞絳三州刺史喜經術數斷大獄務寬平高宗嘉之薨十子長子璩嗣王爲鄂州刺史薨子希言嗣開元中爲右金吾大將軍再爲太子詹事弟察言生二子曰自仙翽自仙爲楚州別駕生夷簡翽爲陳留公生宗閔璩弟琳安德郡公生擇言擇言生勉

李元軌

按唐書霍王元軌傳元軌始王蜀後徙吳多材藝高祖愛之貞觀七年爲壽州刺史高祖崩去官毀

瘠甚服除遂菜食布衣終身至忌日輒累書不食十年徙王歷絳徐定三州刺史進司徒出爲襄青二州刺史越王敗坐嘗通謀徙黔州檻車載至陳倉薨六子緒爲江都王純安定王餘皆爵爲公緒有名譽爲金州刺史誅神龍初並復官爵以緒孫暉嗣王開元中爲左千牛員外將軍

李鳳

按唐書號莊王鳳傳鳳字秀成始王誦爲鄧州刺史俄徙王歷號豫青三州刺史薨七子長子翼嗣爲平陽王薨子寓嗣寓無子爵不傳次子茂融以勇聞垂拱中爲申州刺史黃公譏與越王謀舉兵倚以爲助時詔諸王公赴東都茂融稱疾不朝以俟兵期及得越王書倉卒不能應僚屬勸白其書擢太子右贊善大夫俄爲黨屬所引誅中宗更以鳳孫邕嗣徙王汴累遷衛尉卿薨子巨嗣巨剛銳果決略通書史好屬辭爲東畿採訪使其妃卽張皇后從女弟內不睦巨選府縣官備使令妃亦引蒲博少年分黨招貨賄橈政事宗正卿李遵素私張發巨贓事貶遂州刺史會段子璋反道遂州巨倉卒不知所出卽迎謁爲子璋所殺子則之嗜學年五十餘尙執經太學嗣曹王皐薦之貞元二年繇睦王府長史遷左金吾衛大將軍坐與從甥竇申善貶昭州司馬

李元慶

按唐書道孝王元慶傳元慶始王漢後徙陳出爲趙州刺史貞觀七年徙王授豫州刺史高宗時歷滑州刺史以治績聞遷徐沁衛三州刺史事母謹及喪請躬修墳墓詔不聽薨子誘爲嗣王臨淮爲豐州刺史坐贓削爵更以次子詢之子微嗣終宗正卿子鍊嗣廣德中亦至宗正卿

李元裕

按唐書鄧康王元裕傳元裕貞觀五年始王鄆十一年徙王好學善談名理五爲州刺史遷兗州都督薨無子以江王子廣平公昺嗣薨子孝先嗣開元中爲冠軍大將軍

李元名

按唐書舒王元名傳元名始王譙後徙王歷五州刺史實封至千戶子豫章王亶治江州有美政高宗以元名善訓子手詔褒美治石州二十年數游山林有高蹈意垂拱中徙鄭州爲治廉威進加司空武后時亶爲丘神勣所構繫詔獄死元名坐遷利州尋被殺神龍初詔復官爵時少子鄆國公昭已卒乃以亶子津嗣開元中爲左威衛將軍薨子萬嗣薨子藻嗣

李靈夔

按唐書魯王靈夔傳靈夔篤學善草隸通音律初王魏後王燕爲幽州都督已而徙王頻歷五州刺史遷太子太師垂拱元年徙相州坐與越王謀起兵流振州自殺子詵爲清河王早夭藹爲范陽王知越王必敗白發其謀得不誅歷右散騎常侍爲酷吏所害神龍初悉追復王爵以藹子道堅嗣道堅方嚴有禮法閨門肅如也七爲州刺史遷國子祭酒開元中選授汴州刺史河南道採訪使入爲宗正卿薨子字嗣從元宗至蜀爲右金吾將軍寶應初皇太子子封魯王更封字爲嗣鄒王弟道邃封戴國公恭默自守終尙書右丞

李元祥

按唐書江安王元祥傳元祥始王許後徙王四爲州刺史實封至千戶性庸迷所至營財產無厭薨七子暉爲永嘉王有禽獸行誅死皎爲武陽王餘皆爵公武后時多及誅皎子叢以幼流死嶺表中宗立以從子欽嗣王又以皎封絕更取弟子繼宗嗣旣而以郡王不襲降澧國公

李元曉

按唐書密貞王元曉傳元曉貞觀中爲虢州刺史徙澤州薨子穎嗣爲南安王薨子勳嗣早薨神龍初以穎弟亮養子曇嗣開元五年更詔元曉再從孫東莞郡公徹嗣徙封濮陽郡王歷宗正卿金紫光祿大夫

李元嬰

按唐書滕王元嬰傳元嬰貞觀十三年始王爲金州刺史久之遷洪州都督後坐法謫置滁州起授壽州刺史徙隆州武后時進拜開府儀同三司梁州都督薨子十八人長子修琦嗣爲長樂王餘爵公垂拱中六人死詔獄神龍初更以少子修信子涉嗣開元中授左驍衛將軍薨子湛然嗣從元宗至蜀擢左金吾上將軍

李博父 李奉慈

按唐書隴西恭王博父傳博父武德初例王高宗時擢累禮部尙書特進驕侈不循法度爲帝所鄙按唐書渤海敬王奉慈傳奉慈顯慶時爲原州都督薨

李道宗

按唐書江夏郡王道宗傳道宗字承範高祖卽位授左千牛備身出爲靈州總管時梁師都弟洛仁連突厥兵數萬傳于壘道宗閉城守伺隙出戰破之封任城王貞觀元年召拜鴻臚卿遷大理太宗方經略突厥復授靈州都督三年爲大同道行軍總管還爲刑部尙書徙封江夏授鄂州刺史坐貪贓免官以王就第明年拜晉州刺史遷禮部尙書以疾辭劇就閑改太常卿高宗永徽初房遺愛以反誅長孫無忌褚遂良與道宗有宿怨誣與遺愛善流象州道病薨年五十四無忌等得罪詔復爵邑子景恆封盧國公相州刺史

李道興

按唐書江夏郡王道宗傳道宗弟道興武德初爵廣寧郡王以屬疏降封縣公貞觀九年爲交州都督卒于官

李道元

按唐書淮南壯王道元傳道元性謹厚習技擊然進止都雅武德初例王爲洛州總管府廢更授刺史俄爲山東道行軍總管討劉黑闥以多見褒黑闥再亂道元戰歿贈諡無子以弟道明嗣王遷左

驍衛大將軍貞觀十四年與武衛將軍慕容寶節送弘化公主于吐谷渾坐漏言主非帝女奪王終
鄆州刺史六世孫漢

李孝協

按唐書長平王叔良傳叔良子孝協始王范陽俄降爲郇國公魏州刺史麟德中坐賊抵死自殺弟
孝斌爲原州都督府長史

李琛

按唐書襄武郡王琛傳琛字仲寶本訥少文隋義寧初封襄武郡公授刑部侍郎武德初始王歷利
蒲絳三州總管鎮隰州政寬簡爲夷夏愛便薨子儉襲王例降爲公

李孝恭

按唐書河間元王孝恭傳孝恭少沈敏有識量高祖已定京師詔拜山南招慰大使明年拜信州總
管是時蕭銑據江陵孝恭數進策圖誅帝嘉納進王趙郡俄進荆湘道總管銑降遷荊州大總管孝
恭治荆爲置屯田立銅冶百姓利之遷襄州道行臺左僕射輔公祐反寇壽陽詔孝恭爲行軍元帥

討之江南平進授東西道行臺左僕射行臺廢更爲揚州大都督或誣其反召還錡詰無狀赦爲宗正卿歷涼州都督晉州刺史貞觀初爲禮部尙書改王河間性奢豪然寬恕退讓無矜伐色太宗用是親重之中飲暴薨子崇義嗣王降封譙國公歷蒲同二州刺史終宗正卿

李瑊

按唐書濟北郡王瑊傳瑊武德中爲尙書左丞例王終始州刺史

李瑒

按唐書漢陽郡王瑒傳瑒始爲郡公進王拜左武侯將軍代孝恭爲荊州都督政務清靜後例爲公長史馮長命者嘗爲御史大夫素貴事多專決瑒怒杖之坐免起爲宜州刺史散騎常侍薨

李瑗

按唐書廬江郡王瑗傳瑗字德圭武德時例王累遷山南東道行臺右僕射與河間王孝恭合討蕭銑無功更爲幽州都督瑗素懦朝廷恐不任職乃以右領軍將軍王君廓輔行君廓故盜也其勇絕人瑗倚之時隱太子有陰謀厚結瑗太子死太宗召瑗瑗懼有變君廓內險賊欲以計陷瑗而取己

功說瑗反瑗從之以內外兵悉付君廓王利涉以君廓多翻覆請以兵屬王詵瑗猶豫君廓密知之馳斬銑卽禽瑗縊之傳首京師廢爲庶人絕屬籍

李道彥

按唐書淮安王神通傳神通子膠東郡王道彥幼孝謹高祖初封義興郡公例得王貞觀初爲相州都督徙岷州以父喪解荷土就墳躬時松柏偃廬柴毀雖親友不復識服除復拜岷州都督從李靖擊吐谷渾詔道彥爲赤水道總管軍敗謫戍邊久之召爲嬌州都督卒初武德五年同封者孝賢爲高密王孝同淄川王孝慈廣平王孝友河間王孝節清河王孝義膠西王太宗卽位道彥等並降封公

李孝逸

按唐書淮安王神通傳神通子孝逸少好學頗屬文始封梁郡公高宗時四遷益州大都督府長史武后擅國入爲左衛將軍徐敬業稱兵以孝逸爲左玉鈐衛大將軍揚州行軍大總管帥師南討以功進鎮軍大將軍徙封吳國公威名稜然武承嗣等忌之使人騰惡語聞上武后信之流儋州薨